



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADONAČELNICA

Broj: 01/14-04-355/24
Sarajevo, 23.01.2024. godine

GRADSKO VIJEĆE GRADA SARAJEVA
PREDSJEDAVALJUĆI GRADSKOG VIJEĆA
Komisija za izbor i imenovanja

Predmet: Prijedlog za dodjelu priznanja „Ključ Grada Sarajeva”, dostavlja se

Poštovani,

U skladu sa odredbom člana 12. Odluke o priznanjima i nagradi Grada Sarajeva („Službene novine Kantona Sarajevo”, br. 34/10, 14/14, 31/14, 11/20, 16/22 i 22/22 – ispravka,) kojom je, između ostalog, propisano da prijedlog za dodjelu priznanja može podnijeti gradonačelnica Grada Sarajeva, podnosim:

PRIJEDLOG
za dodjelu priznanja „Ključ Grada Sarajeva”
visokom zvaničniku Nj. E. Dr. Mohammad bin Abdulkarim Al-Isaa

OBRAZLOŽENJE:

Njegova Ekselencija dr. Mohammad bin Abdulkarim Al-Issa glavni je tajnik nevladine organizacije Lige muslimanskog svijeta i nosilac poruke međureligijskog dijaloga, vjerske tolerancije, umjerenosti i mirnog suživota na međunarodnom nivou.

Dobitnik je brojnih međunarodnih priznanja za svoju ulogu u promoviranju međureligijskog dijaloga i umjerenosti te borbi protiv ekstremizma i govora mržnje, uključujući Medalju „Ambasadora međunarodnog mira“; počasni doktorat Univerziteta za mir UN-a za izvanredne napore u podršci međunarodnoj diplomaciji, promoviranju prijateljstva i saradnje među ljudima; Međunarodnu nagradu „Galileo“ za promoviranje civilizacijskog mira i harmonije.

Kao glavni tajnik Lige muslimanskog svijeta, dr. Al-Issa je bio pionir u izgradnji novih partnerstava između različitih zajednica, vjera i nacija. Na svojim putovanjima širom svijeta, susretao se s brojnim svjetskim uglednicima, predsjednicima i premijerima država, parlamentarcima i vjerskim liderima, među kojima su lideri Kraljevine Španije (Juan Carlos); Ujedinjenog Kraljevstva (Charles III); Sjedinjenih Američkih Država (George W. Bush); Južnoafričke Republike (Jacob Zuma); Republike Francuske (François Hollande); Republike Hrvatske (Kolinda Grabar-Kitarović), IR Pakistan (Arif Alvi); Republike Indonezije (Joko Widodo), Republike Singapur (Halima Yacob); Ujedinjenih Arapskih Emirata (Mohammed bin Zayed Al-Nahyan), Republike Srbije (Aleksandar Vučić), Bosne i Hercegovine (Šefik Džaferović); premijer Republike Kosovo (Hashim Thaci); premijer Republike Hrvatske (Andrej Plenković); predsjednik Evropskog parlamenta Luis Martinez; predsjednik njemačkog Parlamenta Wolfgang Schäuble; Generalni sekretar Ujedinjenih Nacija António



Guterres; predsjednica UNESCO-a Audrey Azoulay; Njegova svetost Papa Franjo; Patrijarh moskovski i sve Rusije Kiril; nadbiskup od Canterburyja Justin Welby, te mnogi drugi.

Aktivnosti koje Regionalni ured Lige muslimanskog svijeta sa sjedištem u Sarajevu realizira u Bosni i Hercegovini, održavaju se kroz veliki broj programa i projekata za sve narode u Bosni i Hercegovini, među kojima je djelovanje Kulturnog centra princeze Dževhere Bugojno koji nudi besplatne kurseve, održavanje predavanja na različite teme, poput zdravstva, ekonomije, vjerskih i ostalih tema.

Projekti koji su realizirani za vrijeme mandata dr. Mohammada bin Abdulkarim Al-Issa su pružanje pomoći putem doniranja paketa sa hranom i zimskim potrepštinama, te donacije jetimima širom Bosne i Hercegovine, i to 2021. godine u iznosu od 1.342.922 KM, a za isti projekat 2023. godine iznos je povećan na 2.253.096,41 KM.

Tokom 2020. godine, Regionalni ured Lige muslimanskog svijeta u Bosni i Hercegovini je donirao Vladi Bosne i Hercegovine 300.000 dolara za borbu protiv korona virusa.

Također, važno je napomenuti činjenicu da će dr. Al-Issa, na poziv Parlamentarne skupštine Bosne i Hercegovine, biti učesnik Međunarodne konferencije „Članovi parlamenata i vjerski lideri za mir i suživot“, koja će se održati u Sarajevu, dana 12. februara 2024. godine.

Shodno navedenom, smatram da bi dodjela priznanja „Ključ Grada Sarajeva“ bio najbolji način da se Sarajevo kao glavni grad Bosne i Hercegovine simbolično oduži dr. Mohammad Al-Issa za nesebičnu pomoć Lige muslimanskog svijeta, kao i njegovo lično zalaganje za očuvanje civilizacijskih vrijednosti, promociju mira, razumijevanja i dijaloga među ljudima.

Također, molim da se donošenje ove Odluke predloži shodno članu 127. Poslovnika Gradskog vijeća Grada Sarajeva (hitni postupak) cijeneći činjenicu da za njegovo donošenje postoji neodložna potreba obzirom da će predloženi kandidat prisustvovati Međunarodnoj konferenciji „Članovi parlamenata i vjerski lideri za mir i suživot“ koja će se održati dana 12.02.2024. godine, tako da bi donošenje odluke u redovnom postupku dovelo do objektivne nemogućnosti njene konačne realizacije.

S poštovanjem,

GRADONAČELNICA

Prof. dr. Benjamina Karić

Dostaviti:
-naslovu
-evidencija